



PLAN FEMINISTA
#ENSINNOSOTRES
NUNHAICAMÍN
Aína

“Hai poques muyeres participando activamente nos espacios asturianistes y d'izquierdes”. Ye una fras que se repite constantemente, munches veces con perplexidá, otre con esmolición y otre, nun mos vamos engañar, con alliviu.

Pero, ¿por qué nun participen más? Nun ye poco habitual que cuando preguntes a los homes nesos espacios la rempuesta seya “porque nun quieren”, y suel tar siguida d'affirmaciones tipu: “les puertes tán abiertes pa tol mundu” o “equí nun discriminamos a naide”, poniendo'l focu nes muyeres, en que somos nosotres les que nun queremos participar por “vaya usté a saber qué motivos”.

La realidá ye que munches vegaes somos como la madre de Ned Flanders diciendo “nun ficimos nada y nun sabemos qué más facer”, y poques veces nos preguntamos les razones y munches menos preguntamos a les muyeres p'averiguales.

N'Aína nun queremos quedar na quexa y l'esmolcimientu, queremos dir más allá y saber el porqué, ye por ello que presentamos el Plan Feminista **#EnsinNosotresNunHaiCamín** que vamos redautar y desarrollar nes prósimes selmanes.

Nun queremos que seya un plan que quede en papel moyáu nin que seya daqué de cara a la galería, polo que vamos dir al raigañu de la cuestión y vamos entamar por realizar un **diagnósticu pa saber cuállos son esos motivos que lleven a que les muyeres nun participemos más**. Pa que seya lo más eficaz posible precisamos de la vuestra participación, asina que nes prósimes selmanes vamos unviar una **encuesta** a toles persones inscrites y afiliaes d'Aína y vamos facer una **entrevista grupal** a la Executiva y Mesa Nacional. Tamién vamos facer **entrevistes a muyeres militantes** dientro y fuera d'Aína pa conocer les sos esperiencias.

Toes estes actuaciones van danos una imaxe clara de la organización y de los obstáculos qu'hai pa la participación n'igualdá. Les conclusiones del diagnósticu van servir pa proyeutar aiciones que seyan efectives y que sirvan pa facer d'Aína un referente feminista.

A partir del diagnósticu vamos crear una

serie de protocolos d'intervención, siendo ún de los más importantes un **protocolu d'actuación frente a les violencies machistes**. Desgraciadamente conocemos munchos casos de compañeres agredies n'espacios de militancia. Tenemos recién, por exemplu, el casu del policía infiltráu nos movimientos sociales de Barcelona. Prestaríanos que n'Aína nun pasara nada asemeyao, pero tenemos que tar preparaes pa dar una rempuesta proporcional y contundente que protexa a les víctimes nel casu de qu'asoceda. Tamién vamos desarrollar un **protocolu de participación n'igualdá**, pa que se sienta la voz de toes, y un **protocolu de conciliación**, pa que naide quede atrás.

Amás queremos xenerar un mayor interés por parte de los homes na defensa activa de la igualdá y el feminismu y pa ello queremos que la **formación feminista seya continua** dentro d'Aína.

Tamién somos conscientes que non solo ye necesario ser feministes sinón que tamién hai que paecelo, polo que vamos crear un **protocolu de comunicación feminista** qu'ayude a esparder el nuestru mensaxe de forma clara, respetuosa y inclusiva.

Pero mientras facemos toes estes llabores, que llevarán tiempu, nun vamos parar de trabayar:

N'Aína tán implementándose yá **midies correutores pa favorecer la participación de les muyeres en puestos de representación y responsabilidad** dentro de la organización, como por exemplu la ellaboración d'unes candidatures a los órganos internos lo más paritaries posibles. Consiguióse nel casu de la Executiva y la Comisión de Control y Garantías Democrátiques pero non na Mesa Nacional. Esto ye dalgo de lo que somos mui conscientes y que vamos trabayar por meyorar de cara a prósimes convocatories con ayuda del Plan.

Esti foi un pequeñu pasín de munchos que vendrán. Con muncho trabayu y cola ayuda de toles persones afiliaes y inscrites vamos facer qu'Aína seya un espaciu feminista, transinclusivu y respetuosu cola diversidá funcional, étnica, l'adscripción de xéneru o la orientación sexual, en definitiva, un espaciu seguru pa la participación de toes.

